

Murir en ina grupp sin viadi

Mendra che la mar: La Sahara

DA GUIU SOBIELA-CAANITZ

■ L'entir pievel dals Pajais bass, oravant tut il retg, la regina – da derivanza estra – ed il primminister han retschavì a moda exemplarica las baras da las unfrendas dal sgol MH11. «Dapertut en il pajais han ils umans fatgas endament (...). Curt suenter l'atterrament dals aviuns ad Eindhoven è il pajais stà airi durant ina minuta da silenzi.

Las bandieras èn restadas tuttadi a mesa asta. La saira ad Amersfoort ha la televisiun transmess en directa in cult divin ecumenic (...). [Tut quai cuncontrastava cun] la mancanza da pietad dals separatists pro-russ; lezs, en l'Ucraina da l'ost, avevan impedì dis a la lunga da salvar las baras» («NZZ» dals 24 da fanadur, p. 3). Quai ha stigmatisà Frans Timmermans, minister ollandais d'affars exteriurs, ils 21 da fanadur en sia allocuziun al Cussegl da segirtad da l'ONU: «En ils davos dis avain nus udì istorgias schoccontas ch'ins haja stratg baras e commess enguladetschs a persunas mortas.» In fundament da nossa cultura areguard ils umans morts è la pietad per amur dal fatg ch'i eran carstgauns sco nus, era sch'ins n'approva betg lur acts. Femnas ed umens dals Pajais bass cun lur pietad han mussà lur umanism, lur appartegnientscha a nossa cultura. «Il pajais n'aveva anc mai resentì ina tala ravgia ed ina tala ingiustia» («Le Monde», Paris, 25 da fanadur, p. 4).

Senza identitad

Mintga unfrenda dal sgol MH17 possedeva sia atgna identitad. La societad «Malaysia Airlines» aveva registrà ses num, ses domicil e sia naziunalitad. Quest onn fan ins endament l'Emprima guerra mundiala; en nundumbraivels lieus stattan tavlas commemorativas cun ils nums dals

umens dal vitg u da la citad morts pervi da lezza guerra. Ma i succeda savens ch'unfrendas moran privadas da lur identitad. Cussadents dals champs da concentrasiun nazis vivevan u plitost survivevan senza num, mo pli cun in numer. Unfrendas anonimas tipicas da noss temp èn quels umans che fugian da la guerra, misergia u desperaziun vers l'Europa u ils Stadis unids e moran sin via senza cuntanscher lur mira. «The Economist» (Londra) dals 5 da fanadur rapporta: «Paucs maletgs dals moviments da migrants sur il Mar mediterranean eran uschè dolurus. Ils telespectaturs talians da quest'emna han vesì las baras da 45 Africans auzadas sco capiergnas (like animal carcasses) dal magasin d'ina bartga da pestga nua ch'i avevan pruvà d'arrivar en Europa» (p. 27). «Le Courier» (Genevra) dals 15 da fanadur fa endament: «L'october 2013 èn passa 3500 requirents d'asil morts en in naufragi betg lunsch davent da Lampedusa. Sin quai han la marina e la polizia maritima mess ad ir l'operaziun 'Mare Nostrum' per tschiffar e gidar ils umans en fugia sin bartgas nunadattadas ed evitar tragedias novas. En set mais ha lur flotta da tschintg navs salvà passa 43 000 umans» (p. 2).

Ins basegna soluziuns legalas

Ma tgi che s'embartga per l'Europa sin la riva africana dal Mar mediterranean ha gia surmuntà in impediment forsa anc pli grev: Ils privels da la Libia. «Las charplinas tranter las differentas cuminanzas da lez pajais eterogen mantegnan ina tensiun auta, cunzunt en Cirenaica [la Libia dal nordost sper la mar, G. S.-C.] nua che frequents cumbats tranter facziuns armadas e murdraretschs politics muntan smanatschas da guerra civila*». Il pajais da 1 775 500 km² dumbra mo var 6,5 milliuns umans. La Libia na surve-

glia betg ses cunfins tras la Sahara cun il Niger (354 km), il Sudàn (383 km) ed il Tschad (656 km, cun il punct culminant da 2267 m sur la mar). L'artitgel dal «Courier» gia cità punctuescha: «Il Secretariat regional davart migraziuns maschadadas (RMMS, Nairobi) ed il Cussegl danais per fugitivs han elavurà in rapport davart migrants e requirents d'asil che provegnan da la Corna da l'Africa (...). Tals requirents d'Eritrea, Somalia e Sudàn van adina pli numer tras la Libia vers l'Europa, schebain che lezza ruta munta privels enorms (...). Il rapport dal RMMS di ch'i saja, anc pli privlus da traversar la Sahara' che da traversar il Mar mediterranean. En avrigl han las forzas armadas dal Sudàn chattà 600 fugitivs, cunzunt da l'Eritrea e l'Etiopia, bandunads damanaivel dal cunfin da la Libia. Diesch eran gia morts da fom e da said avant l'arrivada dal succurs (...). Tenor in rapport dal Servezzan gesuit per fugitivs (Malta) vivan ils requirents d'asil en Libia cun la tema constanta da vegnir arrestads (...) dal militar u da las gruppas armadas che controlleschan ina gronda part dal pajais (...). *Melissa Phillips*, perscrutadra dal RMMS, declera: «La gliעד s'embartga per l'Europa per mancanza d'ina moda e maniera legala d'ir en Europa. Ins basegna schliaziuns legalas per cuntanscher l'Europa.» Entant ston ins spetgar vinavant morts anonims en la Sahara libica e sin il Mar mediterranean. Quant ditg anc?

*Paola Fornara (ed.), *Calendario Atlante De Agostini 2014*, Novara (Istituto Geografico De Agostini) p. 750, chavazzin «Libia».

• **Funtauna: Going West. Contemporary mixed migration trends from the Horn of Africa to Libya & Europe.** Adressa: The DRC Regional Office for the Horn of Africa and Yemen, P. O. Box 14762, 00800 Westlands Nairobi, Kenya. Posta electronica: info@regionalmms.org.